

समां - 12:25 hrs.

<><><><><><>

LA -Autum Session

जम्मू-कश्मीर विधानसभा दा पतझड़ आहला इजलास अज्ज श्रीनगर च शुरु होआ। अज्ज पैहले ध्याड़े हाल च पूरे होए दे साबका मिम्बरें गी शरदांजलि भेंट कीती गई। आकाशवाणी दे जम्मू संवाददाता नै जानकारी दिती ऐ जे इजलास दे शुरु च गै स्पीकर अब्दुल रहीम राथर होरें दिवगंत नेताएं प्रति श्रद्धांजलि भेंट करदे होई उन्दा जिक्र कीता- जिनें जम्मू-कश्मीर सनें राष्ट्र लेई चेचा योगदान दिते दा ऐ, जिनें प्रमुख हस्तियें गी अज्ज सदन च चेता कीता गया उन्दे च जम्मू-कश्मीर दे साबका गवर्नर सत्यपाल मलिक, साबका मंत्री गुलचैन सिंह चाढ़क, साबका विधायक दीनानाथ भगत, साबका एम.एल.सी. गुलाम नबी शाहीन, रमेश अरोड़ा, सरदार मोहम्मद अखलाक खान ते मोहम्मद सुलतान पंडितपुरी शामिल हे। स्पीकर होरें उ'नेंगी लोकतांत्रिक कद्रे गी बरकरार रखदे होई जम्मू-कश्मीर दे हितै लेई कम्म करने आहला नेता करार दिंदे होई उन्दी निष्ठा, सेवाभाव ते योगदान गी चेता कीता। सत्ताधारी ते विरोधी धड़े दे मिम्बरें उनेंगी भावे-भरोची शरदांजलि भेंट कीती। स्पीकर होरें इनें नेताएं दे परोआर आहलें कन्नै बी हमदर्दी प्रगट करदे होई उन्दी आत्मा दी शांति लेई प्रार्थना बी कीती। विधानसभा दे इस- केहड़े इजलास दी कारवाई 6एं होर दिनें धोड़ी चलोग जिस दौरान केन्द्र शासत प्रदेश

सरबंधी विकास ते जनहित दे मुद्दे पर कम्में कारवाइयें गी तोड़ चाढ़ेया जाहग। 9 दिने दा एह इजलास औंदी 31 अक्टूबर गी खत्म होग।

<><><><><><>

PM -Rojgar Mela

प्रधानमंत्री नरेन्द्र मोदी होरें रोजगार मेले दे 17में संस्करण गी कल वर्चुअल ढंगे नै सम्बोधित करगंन। इस मौके मुख्य भरै च बक्ख-बक्ख सरकारी मैहकमे च नमें लाए गेदे मलाजमें गी नियुक्ति-पत्र भेंट कीते जागंन। जम्मू प्रांतै च रोजगार मेले दा समारोह रियासी जिले च श्री माता वैष्णो देवी युनिवर्सिटी ककरेयाल दे मातृका ऑडिटोरियम च लोआया जाहग। इस मौके संसदीय मामले दे केन्द्रीमंत्री किरें रिजिजु मुख परौहने होगंन। एह कार्यक्रम नौजवानें गी रोजगार दोआने दे सरकार दे जारी जतनें दा हिस्सा ऐ जेहदे नै रोजगार मेले दा आयोजन करियै नमें भर्ती नौजवानें गी नियुक्ति-पत्र सौपे जन्दे न।

<><><><><><>

Jammu ATVM's

उत्तर रेलवे नै जम्मू डिविजन दे 5 प्रमुख रेलवे स्टेशनें पर आटोमैटिक टिकट जारी करने आहलियां मशीनां लाइयां न तां जे यात्रियें गी इस धयारी रुतै दौरान सुविधा होई सकै। आकाशवाणी दे जम्मू संवाददाता नै जानकारी दिती ऐ जे एह मशीनां पठानकोट छावनी, पठानकोट सिटी, जम्मू, शहीद कैप्टन तुषार महाजन उधमपुर ते श्री माता वैष्णो

देवी कटड़ा स्टेशन पर लाइयां गेदियां न। इनें A.T.V.M मशीनें दी मदद कन्ने यात्रिये गी टिकट लेने लेई हून लम्मिये रींगे च खडोने दी खेचल नेई करनी पौंदी ते बड्डे सुविधाजनक तरीके कन्ने यात्री टिकट, मौके पर गै बुक कराई सकदा ऐ। इनें मशीनें पर अदायगी बी ऑनलाईन कीती जाई सकदी ऐ। सीनियर डिवीजनल कमर्शियल मैनेजर उचित सिंघल होरे आखेया ऐ जे इस पैहल दा मकसद रेलवे स्टेशन पर रश गी घट्ट करना ऐ।

<><><><><><>

I GoC LoC Visit

फौज दी वाईट नाईट कोर दे GoC लैफ्टिनेंट जनरल पी.के. मित्रा होरे राजौरी ते पुंछ जिले आहली कब्जा रेखा कन्ने लग्गदे कृष्णा घाटी ते नौशैहरा सैक्टर च बले दिये तयारिये ते सुरक्षा सरबन्धी सारे इंतजामे दा जायजा लैता। आकाशवाणी दे जम्मू संवाददाता दी रिपोर्ट मूजब इस मौके GoC हुंदे कन्ने Ace of Spades Division दे GoC मेजर जनरल कौशिक मुखर्जी होर बी मौजूद हे। GoC होरे बले कन्ने गल्लबात कीती ते पेशेवराना ढंगे सिर ड्यूटी गी अंजाम देने ते चुनौतीपूर्ण हालात च पूरी निष्ठा कन्ने डटे रौहने लेई उन्दी सराहना कीती। उनें सबबने गी पूरी चाली सौहगा ते स्तर्क रौहने लेई गलाया।

<><><><><><>

PM- Bhai Dooj

प्रधानमंत्री नरेन्द्र मोदी होरें अज्ज **टिक्के** दे मौके पर सब्भनें देशवासियें गी शुभकामनां दितियां न। **टिक्का** जिसी, **बीर टिक्का** या **भाईदूज** बी आखेया जंदा दे मौके पर अपनी इक सोशल मीडिया पोस्ट च मोदी होरें आखेया ऐ जे एह् ध्यार भैने ते भ्राएं बशकार आपसी प्रेम ते विश्वास दा प्रतीक ऐ ते सब्भनें दे जीवने च सुख समृद्धि ते भाग लेइयै औंदा ऐ। प्रधानमंत्री होरें भैन-भाह दे रिश्ते गी होर निगगर बनाने दी कामना बी कीती।

<><><><><><>

PM MKB

प्रधानमंत्री नरेंद्र मोदी होर औंदी 26 अक्टूबर गी अपने रेडियो कार्यक्रम **मन की बात** दे राएं देश-बदेश च रौहने आहले श्रोताएं कन्ने अपने बचार सांझे करडन। हर म्हीने दे खीरले ऐतवारें दिनै 11 बजे प्रसारित होने आहले इस कार्यक्रम दी एह् 127मीं किश्त होग, जेहदे च शामिल करने लेई लोक अपने बचार ते सुझाऽ टोल फ्री नंबर 1800-11-7800 पर भेजी सकदे न। एहदे अलावा लोक अपने बचार नरेंद्र मोदी ऐप जां माई गोव ओपन फोरम पर ऑनलाइन बी भेजी सकदे न। सुझाऽ भेजने दी खीरी तरीक 24 अक्टूबर रक्खी गेदी ऐ। हासल सुझाएं चा ताले गेदे किश बचारें गी इस कार्यक्रम च शामिल कीता जाई सकदा ऐ।

<><><><><><>